

محمد حمدى

جوه مصر

أشعار بالعامية المصرية

طبعة أولى أغسطس 2018

بطاقة الكتاب

عنوان المؤلف : جوه مصر
المؤلف : محمد حمدي
التصنيف : أشعار
رقم الإيداع : 2018-14267
الترقيم الدولي : 978-977-6656-48-2
عدد الصفحات : 100 صفحة
تصميم الغلاف : الشاعر محمد حمدي
رقم الإصدار الداخلي : 137 (طبعة أولى أغسطس 2018)
الإخراج الفني : الشاعر محمد الساعى

جميع حقوق الطبع والنشر محفوظة للشاعر، ولا يحق لأى دار نشر
طبع ونشر وتوزيع الكتاب الا بموافقة كتابية وموثقة من الشاعر

دار النيل والفرات للنشر والتوزيع

ثورة مصرية تشرق إبداعاً على الوطن العربي

المدير العام
جابر الزهيري

رئيس مجلس الإدارة
ناجي عبد المنعم



دار
النيل والفرات
للنشر والتوزيع
أسسها الشاعر ناجي عبد المنعم
حجم 7/2018

رخصة مزاولة مهنة: 58365 - سجل تجاري: 13242 / 2017 - بطاقة ضريبية: 35-01-572
عضو عامل باتحاد الناشرين المصريين رقم 941 لسنة 2018
هاتف: 01011256943 - 01116202218 - 01202541192 تليفاكس: 020554372901
البريد الإلكتروني: م.م.م. محافظة القليوبية - العاشر من رمضان - مجاورة 13 - أمام سنتر الـ 13 - عقار 304
alnilwaalfourat@gmail.com alnilwaalfourat
ج.م.م. محافظة المنيا - أبو قرقاص - شرق الزعرة - خلف محطة السكة الحديد - هاتف 086214428
ج.م.م. محافظة القليوبية - مركز طوخ - إسميى - هاتف 0132424735 (الغروب)

الإهداء

إلى أمي اللي شالت حمل فوق الحمل وزياده
إلى أخواتي عماد ، هدى ، رشا عشان حبوني بزياده
إلى كل اللي شجعني ووقف جنبي وخصوصا اختي
الغاليه الشاعره / جهاد زياده
إليكم كل كلمة حب في عروقي
توصل قلبنا نشتاق
إليكم شكر من أول حرف لغتي
لحد الياء

محمد حمدي

جوه مصر

بعد التحية

والسلام

منغير أي شعارات

ولا تطبيل وكلام

ماهو الكلام آخره كلام

والله كان نفسي احافظ

على اللي باقي من احترام

انا عندي ليكي كتير حاجات

و اسئلة

على حكايات واستجوابات

مهمة ف أمور

مُهملة

هو انتي ليه طبعك كدا ..

مُتَحَوِّلَة

ومصممة ع الظلم ليه

راسمة الطريق ومكملة

خلي باقي بينا خيط

حتى لو كان خيط ضعيف

ما تقطعيش آخر أمل

خلتيني انام واحلم

انك تعامليني زي حد غريب

زي ضيف

انا شوفت فيكي أمور عَجَب

ولا عمر ظلمك يوم عَجَب

قلبي خلاص منك تعب

من كتر ما شال

ومن الآلام

ومن المرار

وبعد العلام

قاعد على القهوة

او ف ضل شجرة

جنب غيط

والشهادة .. يكون مصيرها

تداري شرخ من شروخك

جوة حيط

جوة بيت

قربت جدرانہ خلاص تُقع على سكانه

اللي بنيتي بينك وبينهم ألف سور

طب نعمل إيه

تذكرة المترو بسبعة جنيه

واللصوص ساكنين قصور
وانا حلمي عمره ماكان حسابات بنوك
ولا مليارات ملهاش عدد
ولا زار و دخان ولا مدد
ولا حتى فيلا ولا حتى قصر
اصل احنا شعب غشيم
و بطبيعته عبيط
وانا حلمي والله بسيط
انا حلمي الاقي مكان لحلمي
جوة مصر ...

فاكرين ؟؟

فاكرين لما الغلا وجعنا

نزلنا وكلنا اتجمعنا

ركبنا المترو .. كان بجنيه

كنا ايامها عز البرد

كان ف طوبة أو أمشير

وكان مقصدنا ف طريقنا

محطة ..

و اسمها التحرير

تاريخ مش فاكهه

و وعد نسيت مين خانه

ومش مفهوم

جوابي بدايته و عنوانه

"حدث في مثل هذا اليوم"

هموم بالكوم

لناس احزانها مكبوتة

وعايشة بضكة مش م القلب

وعامله كأنها مبسوطه

وبيزيد الوجع فيها

وبرضه همومها

تخفيها

ومين فينا عايش فيها

وكان يجي .. على باله

تكون دي نهاية الحدوته

نزلنا وقولنا

حرية

فتحننا الباب

ف أرض بدمنا مروية
وجاري البحث ف الأسباب
وحالة شعبنا مالت
وكفة حظنا .. مالت
خنقتا دموعنا ف عينا
وجوعنا ومين حاسس بينا
وكل دا ليه .. عشان كلمة
ياريتها يومها ماتقالت
حلمنا بدنيا وهمية
لقينا الدنيا مش هيه
كرهنا نفسنا لَمَّا
جمعنا شعبنا ف لَمَّه
صرخنا بقلبنا بهمة

نزلنا
وقولنا
حرية
حرية

لينا فيها

ماتسيب ياعم انشالله فرحة لكل عيله

وهما راح يتقاسموا فيها

البلد مش ليك لوحذك احنا برضه لينا فيها

كلنا عارفين بخيرها

وعالجميع بتجود بخيرها

واحنا ملناش حنة غيرها

نروحها او نتدارى فيها

ماتسيب ياعم انشالله فرحة لكل عيله

وهما راح يتقاسموا فيها

البلد مش ليك لوحذك احنا برضه لينا فيها

مصر للعالم علامة

فيها ..؟ أيوة فيها ياما

سيبها انت وبالسلامة
احنا روحها وساكنه فيها
ماتسيب ياعم انشالله فرحة لكل عيله
وهما راح يتقاسموا فيها
البلد مش ليك لوحذك احنا برضه لينا فيها
خيرها مش كثير علينا
تدي غيرنا ليه وناسينا
خاف لاتغرق السفينه
داحنا اتقل حد فيها
ماتسيب ياعم انشالله فرحة لكل عيله
وهما راح يتقاسموا فيها
البلد مش ليك لوحذك
احنا برضه لينا فيها

من غير سلام

فاكرة نفسك إيه

طب فاكرة نفسك مين

ومن البداية

كنتي فين يا بتاعه إنتي

وانا كنت فين

انتى آخر آخرك كان معايا

يادوب يومين

ولما افوق لروحي بعدها

هتبقى بس يادوب رقم

أو تجربة .. وانا من زمان

تجاربي بطلت أحسبها واعدّها

كان عادى جداً بعدها

أبعد واسيبك
ولا البعيدة كان ف بالك
إني أهبل واني هبقا من نصيبك
فوقي يلا كدا
وصحصيلي وركزي معايا
انتي زيك زي غيرك ف النهاية
و اللي ليكي عندي مش زيادة
عن post .. ف كلمتين
على تمثيلية ودمعتين
ولا اقولك
وبصراحة وبدون أفورة
وسامحيني يعني
عارف إنها جاية متأخرة
معرفتي بيكي من البداية

كانت غلط .. لأ .. مش غلط

معرفتي بيكي من البداية

كانت خرا

..! إيه .. شكك زعلتي ولا إيه

طب مانتى فاهمة وعارفة أصلا

قصتنا كان م الصعب تكمل

حتى لو دامت سنين

ولا انتى يعنى تبقي مين

أو بنت مين

ولا انتى يعنى كنتى إيه

مش معايا ف الكلام ده ..

ولا إيه ؟؟ طيب تمام

يلا بقا

ومن غير سلام

الكل شال

من حوالي كام سنة و كام شهر

كنا يدوب لسه بنتعلم اننا

نتعلم

كان الحماس جوانا

والعود شديد والضهر

قادر يشيل الحمل من غير

مانتألم

والكل شال

والحمل بقا زي الجبال

ولا حتى يوم حد اشتكى

ولا ضهره مال

ولا كنا عاوزين منّاها

لا غنى ولا مال
كان الهدف ان احنا نبني
اللي غيرنا بيهدموه
ف بلاد الظلم فيها
اكثر مافيه
واللي يقول الحق صوته بيعدموه
وشبعنا ذل وقهر
بقالنا ييجي كام سنة
وكام شهر

صرخة أم

يا صرخة ام مقهورة
على ضناها اللي راح منها
بتحضن بس ف الصورة
وياريت السادة راحنها
يا دمعة ابن متيتم
وضاع منه السند والضهر
تموتوا انتوا وجحودكوا يعيش
بيلعن فيكوا طول الدهر
يا ريحة الموت ف كل مكان
وعلى بعد الزمان مسموع
يا سكة خدتنا للضلمة
ومش باين منها تاني رجوع

يا فقر وجوع
وفيه عيشنا
ورضينا وقوانا نتحمل
وحتى العمر بتقصوه
وعادي ظلمكوا مكمل
فين صوتكم
مانيش سامع
يا ناس دا الدم ف الجامع
يارب يا كريم يا لطيف
دا كان بيصلي
ليه قتلوه
وحتى ما راعوا
إنه وقتها ف بيتك
وكانك ضيف

لسه عايش

لانا لوحدي

ولا معايا اللي بيخليني ماعشي وحيد

حياتي زحمة وكثير

ولكن مافيش فيها جديد

ولا تغيير

بقوم م النوم انام تاني

يا اما ابوس في فنجاني

لحد ما وش القهوة بالنسبالي

كانه وريد

لسه عايش

لسه عايش مش عشان نفسي

اعيش

لا ده لازم

لا ده لازم حتى لو اسمي

مافيش

عايش ما بين ناسي وصحابي وبحبهم

ومع احترامي ليهم

اللي نفسي يكون معايا

هو كفه

وكفه تانيه يادوب تاخدهم كلهم

بصحى ووبات في ليالي تشبه بعضها

مستني حاجة ما عرفش اصلا اسمها

حب

مفاجأة

انتصار

انهيار

او حتى حرب
واخرج بطل منصور همام
من بعدها
برسم على الجدران حاجات
واكتب و ألف في حكايات
والتي يقوم م النوم عليه
بلليل عليه برضه ببات

خلتيني

كنت شايل

كنت قابل

مش عشان دا طبيعي عندي

اني فوق كرامتي اعدي

كنت شايف

كنت خايف

بيجي يوم ويكون دا عادي

اني اعيش بالغدر راضي

خلتيني

ارضى بحاجات

عمري ما كنت برضى بيها

خلتيني

اقتل مبادني
اللي كنت بعيش عليها
خلتيني اضعف واموت
الف صرخة ماليها صوت
انا اللي كنت لما بصرخ
اه بقولها
بأعلى صوت
كنتي شيء
غالي ف حياتي
عمره ما يكون
له تمن
كنت بحلمك ليلا تي
بحلم شوفته من زمن
كنت فاكرك حد صادق

ع الوعود

ع العهود

ممکن انه یؤمن

كنت شایل

كنت قابل

مش عشان دا طبیعی عندي

اني فوق کرامتي اعدي

كنت شایف

كنت خایف

یيجي يوم ویكون دا عادي

اني اعیش بالغدر راضي

أتوه ازاي ؟

اتوه ازاي وانا موطني ..

انتي

اتوه ازاي و انا غربتي .

بُعدك

يا كل ال جاي والحاضر

ماليش ف الدنيا دي..

بَعدك

وعمري ماقول ف يوم ..

كنتي

انا ليكي

بنيت بيكي

بحبك

ف خيالي مدينة

شوارعها

ملاحك بس

بيوتها كلام بعينا

يادوب يتحس

قانونها

كل شيء ف الكون

بيرضيكي

وانا وظيفتي

اراضيكي

وهبنيلك ف قلبي قلعة

أحمي فيها احساسك

واحميكي

تكون جدرانها

بضلوعي
وسقفها ..
حلمي بوجودك
يكون عالي
يغطيكي
جمالها ..
من جمال عودك
وليلها
لما تغمضي عنكي
ونورها
بتحقيق كل امانيكي
وهغل من غرامك
توب
يكون على اد قلبي

يادوب
وعن كل ال كان
قبلك
انا وقلبي
عشان قلبك
خلاص هنتوب

عروبتنا

نسيت الماضي و رميته

بديت الدنيا م الاول

وكل اللي زمان حبيته

شعوري ناحيته اتحول

كبرت

وعقلي هيالي

حياتي ف صورة متكاملة

وانا برضه

بيتهياي

ان الدنيا مش كاملة

انا نفسي منيش كامل

ولا عمري هبقا ملاك

ولا يعجبني اللي يتحامل

ويرمي تهم

هنا وهناك

على غيره وعال الدنيا

ومين فينا اللي مبيغلطش

وبرضه ف غلظه بيقاوح

وهو نفسه بيسامح

تعالو نمسح امبارح

تعالو نحب ب قلوبنا

ومهما نزيد ف عيوبنا

دا مهما خدتنا

ذنوب و ذنوب

هايجي علينا يوم ونتوب

ونفتخر اننا توبنا

دا توب الشرف

دا توبنا

عروبتنا بتغلبننا

ومهما عثَّها غبنا

بنرجع تاني وندور

على اصولنا

نسيب للغرب عوايدهم

ونعمل بس باصولنا

نسيب ايدهم

وهما يقولوا

يا خسارة

وبخسارة يبصولنا

اساس الدنيا

دا اساسنا

ومن ناسنا
وجدودنا
وسر وجود ما حوالينا
بوجودنا
وطبعنا اصلنا معروف
كرمنا وخيرنا
مع جودنا
للي بقلبه قبل عنيه
لابد يشوف
ياريت تنطقوا بالحق
ومن غير خوف

حدوته

تيجوا نحكي لبعض الحدوته
والحاضر هيقول للغايب
دنيتنا خلاص مش مضبوطة
بقا سايب متساب .. على سايب
..

هحكيلكوا انا أول حدوته

كان واد

بيحب ف بنوته

وهو ف دمها

حبه بيجري

وعشانه متربي وعارف

ان الدنيا دي دائن هيدان

وعشان وعشان
راح جري لباب بيتهم
دغري
خبط عالباب
وقالوله القصة المعتاده
طلبات الأهل وكالعادة
هل عندك شقه
رد وقال .. لأه
وفرش ومصاريف
وصاحبنا حاله حال غيره
العيشة يادوب
والدخل ضعيف
ولكني محوش كام باكو
وخدوهم حتى هنا معاكوا

بس اخذ خطوة وربي كريم

دانا جاي بنية وقلب سليم

بنتنا عرساتها بيتكاتروا

كسروا بخاطره

كان جاي علشان

نفسه وعشمان

بس الدنيا دي بكل اسف

كالعادة

مبتديش غلبان

فصاحبنا رجع تايه

ضايع

مستسلم

للأمر الواقع

وحبييته خلاص

إيه باديها
غير حزن ودمعه ف عنيه
وتلف سنين
وصاحبنا يجرب يتقرب
من غيرها وقلبه قوام يهرب
ويروح ليها
ولازال عثمان لو يجي اليوم
وتكون وياه
ويكون ليها
و ف يوم من بعد سنين فاتوا
الصدفه بتجمعهم تاني
قلبه بتتسابق دقاته
وسألها
حبيتي ف يوم واحد تاني

واتفاجئ انها لسه وحيدة
وعنيها مكاتتش سعيدة
قالها من بكرة انتي معايا
وخلص ربنا عدلهالي
ولقاها بتبعد بعنيها
وبتقوله بلاش
سيبني ف حالي
قالها أنا لسه على عهدي
وهوفي بو عدي
فقالته احسنك تنساني
واتعود على غيري وبُعدي
مستغرب من ردها ببرود
معقوله الحب مهوش موجود
ازاي وانتي مش مع غيري

وانا قلبي رفض يبقا لغيرك
انتي بايدك! تختاري البُعد
مش عارف ارد اقولك ايه
كتر خيرك

..

تفتكروا صاحبنا .. دا كان واهم
وحبيبتة دي .. نوصفها بايه
كان سازج او كان .. مش فاهم
وهي من الأول .. ضاحكة عليه!

شعار

الدم سال

مين اتقتل

الجواب اصبح سؤال

السؤال حله محال

ماالحقيقة اتزيفت

والاجابة اتلخبطت

ومفيش اجابة على السؤال

والكل ناصح

الكل فاهم

الكل شاطر

الكل واعي

الكل تاجر

والوطن اصبح

شعار

ده انقلابي

وده خروف

واما هان الدم بينا

كله خد رتبة حمار

الفقير بينا اتظلم

والسجين بينا اتعزم

ولسه سايقين في الغباوة

واللي بيكبر لمرسي

واللي غنى للفريق

واللي سارق

واللي ظالم

واللي قاتل

اما العميل

حر وطلق

اسألو جنودنا اللي ماتوا

رجعوا سنينا اللي فاتوا

اسألو الشيخ اللي كافر

واسألو اللي بفتوى فاجر

واسألو الشاب اللي صوته

خلى فرعون في القفص

والتمن كان هو موته

واسألوه

مين دبح اخر نفس

واسألو اللي واللي شال

هاتلاقوه تاه في السؤال

مدبحة

التهمة مدبحة

والحكم مدبحة

وبين المدبحة والمدبحة

100 مدبحة

من انهردة مفيش هتاف

ولا حد من حد يخاف

رب العباد شاهد

وعارف ظلمكم

وبحكمكم بقا جبنكم

باين اوي ومتشاف

دي عيوننا لسه مفتحة

التهمة مدبحة

والحكم مدبحة

بس السؤال

مين اللي ليه في كل دا

سبوبة ولا مصلحة

بتنفوا شعب بحاله

عشان بترضوا يادوب شوية

طب فين حقوق كل الماتوا

ال سألوا فين العدل

واما طالبو بالحرية

اللي ماتوا في الميدان

و الشوارع والبيوت

ولا دول مالهومش حق

لانهم مالهومش صوت

واللي كان نازل بيحكموا

اللي ما هنتوش عليه
زي هو ماخاف عليكوا
وضحى ليكوا
خافوا انتوا كمان عليه
خافوا بقا
دا الحكم موت
وانتهى زمن السكوت
وانتوا ولا بتخافوا
حتى من حساب
جاي بعد موت
طب حتى خافوا...
من دعوة ام مظلومة
ابنها بالظلم دا اصبح مدان
رفعت ايديها للسما

ودعت عليكم مع الادان
البلد دي تاريخها يشفع ليها
فوقوا لافعالكوا
وارفعوا الظلم اصبح رمز ليها
لا البلد ف يوم هاتنسى
ولا التاريخ هانسا هلكوا
شعر ابيض في الكراسي متبتين
وشعر اسود في القبور بقوا ميتين
لكن هايجي اليوم
والعدل لازم ينتصر
انتوا قضائكوا مش قضاء
بعتبره انه للبلدي ابتلاء
او حتى انه
قضاء وقدر

ابن بلدك

ياللي بتهينوا اللي واقف

ف عز البرد ف الشارع

عشانكوا انتوا تشوفوا امان

انتوا نايمين

هو صاحي

انتوا تافهين

هو راجل

هو عمره ما كان جبان

انتوا تتريقوا عليه

وهو يعني ذنبه ايه

غير انه عسكري غلبان

اما انتوا

خبيبة ماشية

جذب خبيبة

كل شئ

عكس الحساب

يكفي ان

الصمت هيبية

والكلام

دلوقتي عيبة

بعد اصوات الكلاب

الكرامة والرجولة

بقوا تراب

كل حاجة الوقتي عادي

بعد مايدوق الوجع

ويا الالهانة

ابن بلدك
اللي حتى بموته راضي
انت
شاب عقله فاضى
وهو
بالمقسومله راضي
انت ناوى امتى بس
تكون جدع

نفسي أنول

أنا نفسي اقول

مليون صلاة وسلام عليك يا رسول المؤمنين

كان نفسي انول

شرف اني اعيش زمـنك يا صادق يا أمين

وتبقا مـنك سنـتي في كل شيء

تهدي روي تدلني لنور الطريق

أنسى بوجدك أي خوف

وبهدايتك بس اشوف

وبأمانك أنسي شيء اسمه

الظروف

يا نبينا بيبك عرفنا قيمتنا واحنا نبقا مين

أنا نفسي اقول

مليون صلاة وسلام عليك يا رسول المؤمنين

كان نفسي انول

شرف اني اعيش زمنك يا صادق يا أمين

بحسد اللي عاشوا وياك او شافوك

حسوا بوجودك أمانهم

عرفوا دينهم زاد ايمانهم

ف كل حرف بتنطقه وببسمعوك

صلوا عليه يا موحدین

دانا اقول

مليون صلاة وسلام عليك يا رسول المؤمنين

كان نفسي انول

شرف اني اعيش زمنك يا صادق يا أمين

بحلم أزور بيتك واكون ضيفك هناك

واحس روحك واشكي ليك

ويكون مصيري الجنة بيك
أنا قلبي عثمان من زمان ف يوم لقاءك
وتكون شفيعي عند رب العالمين
أنا نفسي اقول
مليون صلاة وسلام عليك يا رسول المؤمنين
كان نفسي انول
شرف اني اعيش زمنك يا صادق يا أمين

بعد التحية

بعد التحية والسلام

من غير أي شعارات

ولا تطويل وكلام

ماهو الكلام آخره

كلام

والله كان نفسي احافظ

على اللي باقي من احترام

انا عندي ليكي كتير حاجات

و اسئلة

على حكايات واستجوابات

مهمة ف أمور مُهملة

هو انتي ليه طبعك كدا ..

مُتَّحَوِّلَةٌ

ومصممة ع الظلم ليه

و راسمة الطريق ومكملة

خلي باقي بينا خيط

حتى لو كان خيط ضعيف

ما تقطعيش آخر أمل

خلتيني انا و احلم

انك تعامليني زي حد غريب

زي ضيف

انا شوفت فيكي أمور عَجَب

ولا عمر ظلمك يوم عَجَب

قلبي خلاص منك تعب

من كتر ما شال

ومن الآلام

ومن المرار

وبعد العلام

قاعد على القهوة

او ف ضل شجرة

جنب غيط

والشهادة .. يكون مصيرها

تداري شرخ من شروخك

جوة حيط

جوة بيت

قرّبت جدرانها خلاص تُقع على سكانه

اللي بنيتي بينك وبينهم ألف سور

طب نعمل إيه

تذكرة المترو بسبعة جنيه

واللصوص ساكنين قصور

وانا حلمي عمره ماكان حسابات بنوك

ولا مليارات ملهاش عدد

ولا زار و دخان ولا مدد

ولا حتى فيلا ولا حتى قصر

اصل احنا شعب غشيم

و بطبيعته عبيط

وانا حلمي والله بسيط

انا حلمي الاقي مكان لحلمي

جوة مصر ...

،،،

كام سنه

من حوالي كام سنة

وكام شهر

كنا يدوب لسه بنتعلم اننا

نتعلم

كان الحماس جوانا

والعود شديد والضهر

قادر يشيل الحمل منغير

مانتألم

والكل شال

والحمل بقا زي الجبال

ولا حتى يوم حد اشتكى

ولا ضهره مال

ولا كنا عاوزين منّاها

لا غنى ولا مال

كان الهدف ان احنا نبني

اللي غيرنا بيهدموه

ف بلاد الظلم فيها

اكثر مافيهها

واللي يقول الحق

صوته بيعدموه

وشبعنا ذل وقهر

بقالنا ييجي كام سنة

وكام شهر

لو كنا ..

لو كنا صبرنا

ولو كنا

استثنينا شوية

سنة عدت

وعليها شوية

لا كبرنا

ولا حتى صغرنا

مفيهاش حاجة

لو كنا صبرنا

وادينا خسرنا

لما استعجلنا

قولتيلي بسرعه

تعالالي

مانا هبقا معاك

و هستناك

مهما تغيب

عني لياالي

وأديكي

ف دمعك

بتزيدي

وإديكي اهي

فارقت ايدي

ودلوقتي

بتلومي عليا

علشان بُعدي

وطول مواعيدي

ياحبيبتي

حقك تختاري

انا بُعدي

كان شيء إجباري

ولو صعب عليكي

تكون جنبي

ف الآخر غلطنا

قرارنا

ومفيهاش حاجة

لو كنا صبرنا

ولو كنا

استنينا شوية

سنة عدت

وعليها شوية

لا كبرنا

ولا حتى صغرنا

ف مفيهاش حاجة

لو كنا صبرنا

أنا راجع

وانا راجع

وشايل زادي وزوادي وجاي يابلادي

جاي ملهوف

شوارعك مني وخداني

وسامع صوت نشيدك رنّ ف وداني

بيقتل جوة مني الخوف

ببص عليك ف سماكي اللي كات صافية

وحشتيني

ومستنيكي تاخديني

ف أحضانك

فاكرها لسه زي زمان

أمان .. دافية

وانا سايب همومي هناك
لمحتك فجأة م الشباك
دموعي خانتني من شوقي
لقيت صوت فجأة بيقولي
ياسيدي .. وفر الدمعه
لا هي شايفاك .. ولا سمعاك!!
فقلت وداني بتخرف
عشان تعبان ومش نايم
دا حد كنيب .. ومتشائم
دي بلدي هي أم الكون
فخور بيها لفين مابكون
عاشقها برضه مهما يكون
طلعت غشيم .. ومش فاهم

شكلي كبرت

انا شكلي كبرت
والخلق خلاص عمال بيضيق
مبقيتش اتحمل زي زمان
وان حد ف يوم بقا يشكلي
مبقولش اتفضل واحكي كمان
مبقيتش بطيق
كان عندي الاول طولة بال
والقوة بجد تهد جبال
بس دا عادي
زعلان انا ليه للدرجادي
ماهي برضه الدنيا مسيرها زوال

واتعلمناها انه لا يمكن

هيدوم الحال

لو مهما حاولت

انا شكلي كبرت

مش جدع

تقولي اني مش جدع
للدرجة دي قلبك قوي
قلبي زعل منك اوي
وخلص سابك وجالي
خلص رجع
بس اتوجع
دانا سيبه ف اديكي امانه
ليه كده
طب بس ردي بالأمانه
خلص كده
والكلمه دي قولتيها وانت

متأكده

بزمتهك

انا كده؟

دانا بعتهك

روحي وحياتي وببلاش

وقولتلك اقبليهم مني انا

دانا قلبي كان ميت

وعشانك انتي

رجع وعاش

بالله عليكي

دي تبقا ايه

غير جد عنه

مش مهم

مش مهم

مش ضروري

مش لابد اكون رومانسي

وبكلام حلو

اثبت حضوري

الجمال ف الحب لما

يبقا جاي بحماس و همة

يكون ملموس

يكون متشاف

اكون ملهوف

عليكي اخاف

فمش مهم كل ساعة

تفكريني

اني قاسي

واني مش شايلك

ف عيني

ياحبيبتي حبي ليكي

بان عليا وبان عليكي

لما بعت الدنيا

وجيتك انتي

واختارت اني

اشوفها من جديد

بس بعنيكي

التحرش

التحرش مش هواية

او دراسة

لا يا عالم

لا ياناس

ده التحرش ده جينات

وكمان وراثه

ماتلوموش الشاب لما

يبقا قاعد وسط لمة

ويشوف

ليجين

ميكرو

جينز

فيجا

وكت وكب وكارينا

ابوس رجليكي

ارحمينا

زمان

الشاب كان عمره يادوب 20

ومتجوز

ودلوقتي

شبابنا شاب ومش لاقى

وخلص ضايعين

وماشي ف عز عمره

مبوز

طبيعي اننا نهيس

دقه قديمه

عاوزة تشيش

وشعرها عادي

ايه يعني يبان

تلبس ديق

خليك كول

الغيرة دي شيء

مش معقول

فرق كبير بين انك تبقا

راجل - أو - مان

او عاك تقفش

احسن تبقا

دقه قديمة

غير على قدك
وفوك بقا من جو السيما
سيدك السيد
ماخلص راح
وخذ وياه الغيرة والنخوة
احنا الوقتي
في عصر السبكي
وسيدك السيد
كابتن هيما
ف او عاك تقفش
احسن تبقا
دقه قديمة

الغربة

وانا ف بلدي
انا كنت راجل اوي
لكن كنت مواطن
رخيص متهان
وانا في الغربة
صغرت بقيت ولا العيل
ضعيف وجبان
كاني يادوب ياناس لسه
انا مولود
لا عارف حاجة ولا ليا
بلد تسندني او حتى
تشدد العود

انا ف غربة
بدور فيها على صاحب
يكون طيب ويتصاحب
عليا يهون الايام
لو اتعب
يجي جري اوام
لقيت الصحبة في الغربة
ياناس اوهام
صحاب ايه بس
وهما فين
اسامي يادوب
كمالة عدد
اخرها تبقا ف الفتارين
انا مخنوق - انا عاجز

ببص لفوق
ومش عايز
غير اني اكون
واعيش وابني
لحد ماشوف
ياتاس ابني
فخور بيا واني ابوه
ويلقا اهل بيحبوه
ده حلم حياتي
وانا خايف - انا خايف
لا مني يتوه
انا مخنوق
كأن روعي بتسيبني
وكل يوم بيجي اصعب

وبعد ده كله
طبيعي الاقيني
عليها اصعب
تروح عيني
بدون ما احس بتدمع
ودمعي يقول
ليه الغربه؟
يلا ارجع
اروح ضاحك
ضحكة طالع
في وسط زحمة من الحاجات
والحاجات دي
أصول نعيشها من سكات
اوعى تحكي

اوعى تشكي

انت راجل

وعيب عليك تزعل وتبكي

اكتم الجرح وخسارتك

جوه روحك

داوي بجروحك جروحك

اقسى على قلبك وعادي

لو لقيته فلحظه مات

وافضل اضحك

ضحكة طالعہ

ف وسط زحمه من الحاجات

والي كنت فيهم انا عثمان

طلعوا ناوينهالي اصلا

من زمان

واللي عمري ماكنت يوم
عامل حسابيه
للاسف
انا عيشت فيه
كانه سم ف الهوى مرشوش
مالي المكان
عمري يوم ماجه ف بالي
الغدر يجي منهم
وف عز ماكنت انا
فرحان بهم
مآمنلهم
باعوا فيا واشتروا
قبل الاوان
واهو هما دول

اللي كنت انا فيهم
ياتاس عثمان
لا صحبة حلوة ولا حتى
وطن يحضني ويعوض
صدمتي فيهم
وسنين حرمان

دبلة الخطوبه

علمونا زمان
من واحنا صغيرين
ان الجواز
يبقا نص الدين
وبعد سنين
كلام وعلام
بلدنا شويتنا
عالجنبيين
ولما قولنا نتجوز
لأنه يبقا نص الدين
لقينا روحنا بنعاني
فخسرنا نص ديننا الثاني

يا دبلّة الخطوبة

عقباننا كلنا

ونبني طوبة طوبة

في (قبر) حبنا

وبعد مرار وبعد عذاب

وصلنا خلاص لكتب كتاب

دخلنا برجلنا الخية

وقفلوا علينا ٥٠ باب

..

شقا عمر وفرح ليلة

جواز ايه بس

بلا نيلة

اجيبها تعيش وتحرمني

انا عارف أعيش نفسي

عشان تيجي واحدة تقاسمني

دانا والله كان نفسي

مفيش ف ايديا انا حيلة

جواز ايه بس بلا نيلة

..

دانا لوحدي

وكلي متاعب

ف سامحوني

مانيش لاعب

خلوها دمار

80 سنة جوه الجحور

مالهومش ملة ولا وطن

ولما طلّعوا وشافوا نور

بخوا الخيانه والفتن

قلبوا نظام حكم

خلوها دمار

قادوا ف قلوب الامهات

حسرة ونار

مليون شهيد ويتيم

واحزان عالراحوا

لما الخراب بيزيد

يهدوا ويرتاحوا

حبة كلاب

قالوا انقلاب

على شعب كان ع الظلم لازم

يوم يثور

80 سنة جوه الجحور

محتار

بين المحال وبين المستحيل

محتار

بين الرجوع

او اني افضل بعيد

غريب وحيد موجوع

يا بلدي

باللي كنتي

حضرن للامان

مبقاش ليه

لينا فيكي كيان

ولا مكان

بنشوف منك كتير

ونشوف فيكي كثير
ولا يوم هونتي علينا
مبقيتش عارف احنا
خسارة نكون ولادك
وان انتي بقيتي محنه
ولا انتي خسارة فينا
وحلال فينا بعادك
محتار
بين البعاد والعيشة
بدون وطن والذل
والاستعباد ف بلد
ملهاش تمن
يابلد
من خيبتك شعبك داب

من كتر ماصدق ف وعودك
يا عروسة قرفتها هباب
مبقاش يغريني جمال عودك
ولا قادر تاني ارضى عليكي
ولا اقادر اكمل ف بعادك
الظلم معشش ليه فيكي
والفقر

بقا رزق ولادك
ولا قادر ابعد
ولا عارف ارجعلك ؟
سامحيني انا خايف
وحشاني
ونفسي اني اجيلك
ملقيتش ف يوم ليكي بديلك

لكن

مش راضي خلاص عنك

وبرجع من تاني

وبدعيلك

مقدرش

اتبرى منك

ولا سهل

اقسى عليكى

و رغم

ال انا شوفته منك

انا روجي برضه فيكي

صرصار وشماعة

مِساء الفُل يا جماعه
معاكم شخص تصنيفه
انه ف الحياه صرصار
مسمى وظيفته شماعة
وسامحوني اني بقول
"صُرصار وشماعة"

للأسف

الوصف كان علشان
كلنا عايشين ف بلاعه

..

كَمَا الصراصير ..

وهُمَا فُوق

فَلَا زِمَ نَعْرِفَ قَدْرِنَا

وَنُصَحَى لِنَفْسِنَا

وَنُفُوقَ

إِحْنَا وَزَيْنَا يَامَا .. فِ تَقْدِيرُهُمْ

مَنْسَوَاشْ فِ الْحَيَاةِ سَاعَهُ

تَعْدِي .. وَبِيهَا مِيحْسُوشْ

مَتَتَضَايِقُوشْ

مِيسَاءُ الْفُلِّ يَا جَمَاعَهُ

مِيسَاءُ الْوَرْدِ وَالْيَاسْمِينِ

قَوْلُولِي صَحِيحْ

مَحْدَشْ شَافْ بَشَرْ بَاقِيَيْنِ ..؟

مَنْ النُّوعِ الَّلِي عِنْدَهُ ضَمِيرٌ ...!

أَكِيدُ مَشْ قَصْدِي بَنِي آدَمِينِ

لَأَنَّ النُّوعَ دَا مِنْهُ كَثِيرٌ

مانا بينهم وشايفهم ولا مسهم

ومش ونسان

ما ياما كتير قلوبهم ماتت

ومكتوبة ف الورق .. إنسان

ف دنيا خاينة بياعة

مساء الفل

يا جماعة

لسه لوحدي

قاعد بتكلم مع صاحبي

شيء عادي بيحصل علطول

بحكيه وبشكي وبفضفض

وبيسمعلي

لا بيزهق ولا عمره بيرفض

ولا ينسى كلامي ولا ينفذ

ومن كتر كلامنا كلامنا يطول

بحكيه ازاي انا عمري بيجري

منغير مالحقه .. منغير مادري

زي رصاصه

وبدون ماشعر انا دوست زناد

والواقع انا لسه لوحدي

انا صاحبي ما بيني وبينه بلاد
عامل نفسي عادي مكمل
ومتحمل وبتحمل وبتحمل
بس الحقيقة
الغربة دي وجعها زاد
ان من كثير ما بحكي لأصحابي
منغير حتى ما يعرفوا ولا بيشوفوني
وببات لوحدي بعد سهرة
حلوة مع اللي بيوحشوني
بدون وجودهم
بخلق لروحي كون يكون
يخلي الوحدة فيا تهون
الكون دا كل حدوده
مرسومه بحدودهم

وبدون وجودهم
فاكر يا صاحبي لما كنا
بنشيل عن بعض مشاكلنا
وبنحكي لبعض ف همونا
مهما انت تشغل
ومهما انا الايام خدتني
انا لسه فاكرك
بس خوفي تكوني نسيتني
مبقاش بينفع حتى اني
اقول ياريتني

محتوى الكتاب

2	بطاقة الكتاب
3	الإهداء
4	جوه مصر
8	فاكرين
12	لينا فيها
14	من غير سلام
17	الكل شال
19	صرخة أم
21	لسه عايش
24	خليتنى
27	إزاي أتوه
31	عروبتنا
35	حدوته

41 شعار
44 مدبحة
48 ابن بلدك
51 نفسى أنول
54 بعد التحية
58 كام سنه
60 لو كنا
64 أنا راجع
66 شكلى كبرت
68 مش جدع
70 مش مهم
72 التحرش
74 دقة قديمة
76 الغربة

83 دبلۃ الخطوبۃ
88 محتار
92 صرصار وشماعۃ
95 لسه لوحدى
98 محتوى الكتاب